

公民記者 kap 網路福音

Lîm Chùn-iók 林俊育

踏話頭

電腦科技 ê 發展 ē-sái 講是「日新月異」，每工 lóng 有真 chē 種新產品推出，hō 咱霧 sà-sà。少年人 tī 科技時代 teh 成長 m̄ 但無問題，koh 是「樂在其中」kah 「廢寢忘食」；但真 chē 年長 ê 人講 tiòh 電腦 tòh 驚，á chit 種「驚」ê 惡性循環，hō 你 kap 時代 jú 來 jú 脫節，kap 咱 ê 第二代失去溝通 ê 牽連，soah 活 kah 真鬱卒 koh 無尊嚴。

若是勇敢面對科技時代 ê 挑戰，tiòh 了解電腦是上帝憐憫人腦 ê 有限，beh 用來輔助處理咱人類大量增加 ê 資訊，咱 tiòh 一步一步來認真學習，每 pái 新 ê 成就 lóng 會 hō 咱「感謝主 koh o-ló 主」。

《台灣教會公報》2803 期 ê 人物專訪講我是「老頑童」，就是 teh 講我 m̄ 認老 koh 「衝衝衝」lah。其實有一位比我 koh-khah 前輩 ê 「老老頑童」一賴永祥長老，我 1990 年搬來波士頓就 tī 教會認 bat chit 位台灣教會史專家，我知伊有真 chē 紙本寶貴 ê 台灣教會史料，就 kā 伊遊說來將 hiah-ê 資料用電腦數位化上網，hō 大家 ē-tàng 來活用研究。伊起初 lóng 講伊 khah 習慣傳統 ê 紙本處理，我用實際 ê 行動 kap 成果來說服伊，到約十年前伊也近八十歲 ah chiah 開始學電腦「輕鬆台語輸入法」（用白話字 phah 漢字），到 2007 年也建立網站（<http://www.laijohn.com>），成做台灣教會史料目前 siōng 完整 ê 網站。人人 o-ló 伊家己 ê 網站，伊 lóng 笑 hi-hi 回答講：「確實 bē-bái lah。」

Tī 現此時 ták 項 lóng 是網路 ê 時代，我真歡喜來 kap 大家分享我 ê 「公民記者 kap 網路福音」心路歷程。

盲人事工 hō 我電腦化

大學畢業了後，我 tī 1972 年投入台灣產品外銷 ê 貿易，包括項目複雜 ê 電子 kap 汽機車零件，計算成本歷經算盤、掌型計算機 kap 電腦，阮是台灣第二間使用「迷你電腦」ê 公司，電腦 hō 我 ê 公司業務大發展。到 1988 年我 tī 雙連教會擔任服務委員會主委就開始盲人事工，使用電腦 phah 字寫「關懷視障」ê 文章投稿，也用電腦家己排版來出版「西羅亞通訊」，同時也推動教會週報 ê 電腦化。

「西羅亞合唱團」（團員 lóng 是盲人）tī 1989 年成立了後就四界演唱，用見證上帝 ê 疼來傳福音，我 買一台錄影機來記錄 in 美好 ê 見證，並製作錄影帶來將 in ê 見證廣傳。到尾 soah 變成「有時間錄，無時間看」ê 地步，就停止錄影。

到數位錄影機上市，我 koh 買一台來繼續錄影、製作 DVD，koh-khah 方便來廣傳西羅亞合唱團 ê 美好音樂見證。

公民記者

國際網路是無可限量 ê 平台，就是獨立 ê 公民個體 ē-tàng 藉網路 ê 參與 kap 分享，建構一個充分自主 koh 包含群眾力量 ê 新公民社會。

2002 年，蔡明峰先生就設立「台灣海外網」（<http://www.taiwanus.net>），建立台灣人 tī 海外發聲 ê 網路平台。我感覺這是我久長走 choē ê 路線，就報名參加 tī 波士頓 ê 說明會，認 bat ùi 台灣來 ê 網路專家曹濟平先生。

Tī 曹先生 ê 熱心指導之下，我學會曉「威力導演」（PowerDirector）ê 製片軟體作業，就開始 tī 台灣海外網設口座來上網。每片影音 lóng 有「人氣記錄」（點看 ê 人數），看 tiòh 時時 teh 增加 ê 人數，心內有無比 ê 成就感。

台灣公共電視台 ê 「PeoPo 公民新聞平台」（<http://www.peopo.org>）tī 2007 年開始營運，受 tiòh 「公民記者突破媒體霸權」ê 呼召，我也正式成做一位「公民記者」。因為上網數量 chē koh 品質 bē-bái，我被選以公民記者 ê 身分參加 2008 年總統大選辯論會會後記者會，當面問候選人 ê 「台灣母語政策」現況被其他公民記者錄影上網，「公民記者」hō 我感覺人生第二春 ê 喜樂。

我也受選參加「優秀公民記者訓練會」，經過一工 ê 密集學習，我 ê 錄影製片技術大進步。我就將「Peopo 公民記者」ê 貼紙貼 tī 我 ê 錄影機頂面，四界去採訪錄影，不止 á 受歡迎接納，鄭兒玉牧師 kap 張德謙牧師 bat 邀請我去採訪台灣長老教會 ê 活動。

我採訪 ê 主題有詩歌見證、教會活動、弱勢關懷 kap 台灣民主運動，上網到 taⁿ，tī 台語信望愛有 260 片，客語信望愛有 41 片，台灣海外網有 497 片，Peopo 公民新聞台（我 ê 口座：Chuniok）有 213 片，Youtube（我 ê 口座：Chuniok）有 98 片。

網路福音事工

感謝上帝 ê 引 choā 帶領，2004 年 kap 信望愛網站合作成立「台語信望愛」
（<http://taigi.fhl.net>），我也帶入現代科技 ê 影音網路福音事工，將傳統 ê 福音事工經過錄
影製片上網 kā 伊延伸出去，是我 siōng 大 ê 喜樂。Koh tī 2006 成立「客語信望愛」
（<http://hakka.fhl.net>），也 tī 2007 年成立「思羅安信望愛」（台語點字
<http://sloan.fhl.net>）。

網路影音 ê 時代，尤其是年輕 ê 一代 koh-khah 偏向透過影音來吸收資訊。剪接製片
tiòh 需要下工夫，tī 5~10 分鐘片長 ê 中間 tiòh 保持熱場，hō 讀者觀眾全部吸收你所 beh 傳 ê
信息。詩歌 ê 歌詞字幕真重要，若無字幕，觀眾 sa 無詩歌 ê 信息，所以我 tī 歌詞字幕相當
下工夫。

像 Peopo kap Youtube 等網路平台 lóng 有免費提供部落格性質 ê 服務，所以除了採訪
教會 kap 機構做紹介 ê 錄影上網以外，我也鼓勵各教會 kap 機構成立網路影音小組，將平
時 ê 活動 kap 感動人 ê 見證製片上網，成做對社會大眾傳達信息 ê 平台。大部分 lóng 是聽
聽 leh 講好，但是可惜真少有行動。新眼光電視台開 hiah-chē 錢，若撥 koá 來推動教會 ê
「公民記者」網路福音事工，可能會 koh-khah 開花結果來榮光上帝。

製作一片影音片，ē-sái 上網台語信望愛、台灣海外網、公民新聞台（Peopo）kap
Youtube 等等免費影音平台，tī 傳福音 ê 功效來講是「一舉數得」koh「事半功倍」。像講
聖經故事《浪子回頭》布袋戲上網，到 2010.9.30 為止，人氣 tī 台語信望愛有 11,329 人次，
台灣海外網有 309 人次，公民新聞台有 1,075 人次。我前策劃製作 ê 《馬偕在台灣》布袋戲
DVD 已經發行 23,500 片，分段上網 ê 觀賞人次也超過十萬人次。所以我有新計畫 koh 來製
作「十個聖經故事」布袋戲 ê DVD，thang 做教會主日學 ê 教材，也 ē-tàng 上網廣傳福音。

結尾 ê 話

「Tiòh 從福音傳 hō 萬民聽」kap「福音 tiòh 傳到天邊海角」，基督徒 lóng 抱 tiòh chit
兩個異象 kap 決心，koh 常常祈禱講：「主 ah, 我 tī-chia, 求祢差遣我！」，但因為不得要
領 soah tiāⁿ-tiāⁿ 有挫折感。

上帝回答我 ê 祈禱講：「我知每一人 ê 能力有限，所以我 hō 人類有夠額 ê 聰明智
慧來發展電腦網路科技，這是 siōng 好 ê 傳福音管道。」有影 tóh-tiòh, 我無讀神學院 m̄ 是牧
師，我 bē 曉唱歌無參加聖歌隊，但我學會曉 kā 牧師傳講 ê 信息 kap 聖歌隊獻詩錄影製片
上網，就是將傳統 ê 傳福音方式用影音記錄落來，tī 網路頂面延伸出去，「傳到天邊海
角」去「hō 萬民聽」，koh ē-tàng 傳到萬世代，咱 ê kiáⁿ-kiáⁿ 孫孫也看會 tiòh，「何樂而不
為」neh。